



Kamis , 21 Oktober 2021
Ogen: Epesus 6:18



Ertoto Guna Anak-Anak Dibata



Nina belas-belas kalak sierkiniten 'doa adalah kata yang paling tulus dan jujur'. Sabab ibas paksa ertoto me banci situngtungen kerina isi pusuh, pengarapen ras kecibalta man Dibata. Iadapen Dibata kita 'menyerah' ngendesken kerina geluhta, la lit kebayaken, kepentaren, kinijilen ras kerina kelebihanta sibanci si hagaken. Sabab kerina e rehna ibas Ia nari, Ia me ulu sinasa lit, janah man baNa me kita mindo.

Surat ras pedah Paulus man perpulungen Epesus rikutken renungenta sendah eme, kai pe sibahan kita arus ipalasi pertoton. Siende ikatakenna ibas situasi perpulungen ngalaken erbage tantangan geluh ibas njaga kinitekenna. Makeken perlengkapen sijadi senjata, kenca makeken sie la banci lang arus ipalasi mindo man pergegeh ras perkuh ate Dibata. Kalak sitek arus metenget nandangi kerina kejadien ras situasi isekelewetta. Isuruhna kita erjaga-jaga alu ertoto. Yesus pe ibas ngalaken perbeben mpersingeti ajar-ajarna nina 'erjaga dengen ertotolah gelah ola kam ndabuh kudas percuban. Ukur mehuli me tapi daging kote kap' (Matius 26:41). Bageme kita ibas nggeluh dengen ngelai Dibata. Ertoto la saja guna dirinta, jabuta ras dahinta tapi pe guna kerina anak-anak Dibata.

Tanggungjababta dahin pebelangken ras nggeluh ibas Berita Si Meriah. Termasuk wari endape serayan Tuhan subuk ibas Moderamen, klasis ras kerina unit bagepe persekutuan kategorial ngelakoken Sidang Kerja Majelis Sinode (SKMS). Ngidah ku lebe kerna perdalinen kegeluhen kalak sitek arah pelayanen GBKP. Totonta kerina siikut ibas SKMS enda tetap sehat mejuah-juah dengen ngukuri program pelayanen gerejanta asa ngasup gegeh. Sienda kerina tujunna guna kemulian Dibata.